



**Uunga siunnersuut: Nioqutissanik eqqussuinermi akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xXx 2016-imeersoq (Erngup puiaasamiittup imigassallu koffeinimik akullit akitsuutaat)**

(Aningaasaqarnermut Aatsitassanullu Naalakkersuisoq)

(Siullermeernera)

Demokraatini nuannaarutigaarput erngup puiaasamiittup imigassallu koffeinimik akullit akitsuuserneqarnissaat kiisalu akitsuutit 2015-mi kingumoortumik eqqunneqartut atorunnaarsinnissaat oqallisigisinnaanngoratsigu.

Imigassat koffeinitallit qillertuusamiittut kiisalu puiaasamiittut pillugit akitsuut ilalerparput naak isumaqartuaannarsimagaluarluta sipaaruteqarnissaq iluarsartuussinissarlu pitsaanerpaajusartut akitsuusersuinerminngaanniit.

Imigassalli koffeinitallit ilaat aamma peqqinnissamut annikitsumik iluaqutaasinnaapput taamaattumik imatut annerusumik naammagittaalliutissaqanngilagut.

Iluarinerussagaluarparput sukcut tamaana akitsuutinik eqqussuinata sipaaruteqarnissaq agguaasseqqinninnerlu qularnaarsinnaasuugutsigit, taamaasillutalu pisortaqarfiit aningaasaqassutsitsinnut tulluussarlugit.

Nalunngilarput Naalakkersuisut nutaat kinguaattoorfiusut assigiinngitsut iluarsiiviginiarlugit ulapputtut aamma akitsuutinik annikillisaanerit taamatullu inuussutissarsiutinik siuarsaanerit siusinnerusukcut pisimasariaqaraluartut, nalunngilarpulli piffissaq sivisooq atortariaqartoq - taamaakkaluartorli peqataanik sulilluta aallartittariaqarpugut, iluarsartuussinissarput, sipaaruteqarnissarput il.il. sapinngisamik piaartumik aallartissinnaajumallugit.

Ilisimavarput akitsuut Demokraatit, Siumup Atassutillu naalakkersuisoqatigiinnerminni 2015-mi isumaqatigiissutaannut ilaasoq, isumaqarpugulli akitsuummik eqqussisariaqassagutta, eqqussisariaqartugut atuisunut oqinnerpaamik kiisalu iluanaarutissat taamatut annertussusillit eqqunneqassasut avatangiisinik illersuinerunissaq tunaartaralugu - assersuutigalugu puussiat plastikkil akisunerulersinnerisigut.

Avatangiisillu iluaquserumallugit atuineq naleqqussarneqassappat aamma tunisassiat avatangiisinut immikkut ulorianartorsiortitsisut akitsuusersorneqarsinnaapput.

Suuneri imatut taagupallassinnaavagut; assersuutigalugu akitsuusersorneqarsinnaapput ermiutit ataasiartakkat plastikkilertalerlugit sanaajusut aamma saviatsit isungutasut akuutissanik ulikkaartut, aamma sanaartornermi atortut avatangiisinut peqqinnanngitsut akitsuusersornissaat



isumassarsiorfiusinnaavoq, qalissiat, illut iloqutai, plasticinik imallit imaluunniit illulerinermi atortartut atortussat akuutissartallit.

Akitsuutit akilerteriikkat utertinnissaat eqqarsaatigalugu assigiinngitsunik isornartorsiutissaqarpugut aamma 2015-mut Aningaasanut Inatsisissaq suliarinerani Aningaasaqarnermut Naalakkersuisumut isornartorsiugatta saqqummiussimasatsinnik.

Taamani oqarpugut kissaatigalugu pisortat misissuititsissasut paasiniaarlugu pisortat ingerlatsiviini sorliit namminersortunngorsarneqarsinnaanersut iluaqutissartalimmik kiisalu aamma ujartorparput akileraartarnikkut tungiuinermilu iluarsartuussinikkut sinaakkutissat pingaarnerit suut pissarsiarisinnaanerigut.

Tungiuinerup iluani allannortiterinikkut aningaasanik aallernissarput suli kissaatigaarput, amerlanerit sulilersikkumallugit kiisalu inuit pisortanit pilersorneqartut imminnut pilersulernissaannut aporfiit piiarneqassasut kissaatigaarput.

Pisortat ikiorsiissutaannik pisarunnaarnissaq suli ajornartorsiutitaqarpoq - ilaqutariinnut imaluunniit innuttaasunut ataasiakkaanut suli iluaqutissarsivigineqarsinnaanerusarmat pisortanit pilersorneqarnissaq imminut pilersulerumalluni sulilernissamut naleqqiullugu.

Akitsuutit kingumoortumik atuutilernejartussat suliarineqarnerat eqqarsaatigalugit oqaatigissavarput, isumaqatigiinniarnert ingerlanerini partiit arlallit oqaaseqartartuinit arlaleriarluni oqaatigineqarmat, akitsuutit atuutilerfissaat qularineqartoq aamma qularineqarmat akitsuutit pineqartut kingumoortumik atuutilersinneqarsinnaanersut.

Taamaakkaluartorli Aningaasaqarnermut Naalakkersuisoqarfiup, uagut Akileraartarnermut Aningaasaqarnermullu Ataatsimiititaliami ilaasortat kiisalu inatsisartut tamatta saqqummiunneqartoq akuerinikuuvarput, taamaattumik kissaatigaarput siunnersuutip nutaap ataatsimiititaliami qaqilerluarneqarnissaa taama annertutigisumik kukkuluttortoqaqqinnissaa pinngitsoortikkumallugu.

Nassuerutigisariaqarparput tamarluinnatta innuttaasut annerpaamik utoqqatserfigisariaqaratsigit kukkorujussuarnerput pissutigalugu.

Demokraatini qinngarnartut akitsuutit suliarineranni taamarsuaq kukkuluttortoqarsimanera ajuusaarutigeqalutigu oqaatigissavarput. Utoqqatserpugut Kalaallit Nunaat.

Taamatut oqaaseqarluta siunnersuutip matumap Aningaasaqarnermut Akileraartarnermullu Ataatsimiititaliami suliareqqinneqarnissaa innersuupparput.